

**U ovom broju, između ostalog, čitajte:**

- **Sastanak o mogućnostima saobraćajne deblokade Gradačca i Srebrenika**
- **Direktorica FUZIP-a na sastanku s predstavnicima poslovne zajednice u FBiH najavila donošenje posebnog programa preventivnog inspeksijskog nadzora**
- **Rukovodstvo UPFBiH na sastanku sa ministrom Delićem**
- **Informacija o zloupotrebama izdatih radnih dozvola i viza tipa D**
- **Primjena Uredbe o isplati pomoći od strane poslodavaca**
- **Ministar finansija informirao Vladu o statusu pripreme seta fiskalnih zakona**



## Sastanak o mogućnostima saobraćajne deblokade Gradačca i Srebrenika



U okviru 51. Međunarodnog sajma poljoprivrede i prehrambene industrije – Sajma šljive, na inicijativu Grupacije poslodavaca TK pri UPFBiH, gradonačelnika Gradačca, Srebrenika i Brčko distrikta

BiH i u saradnji sa UPFBiH održan je sastanak sa premijerom i članovima Vlade FBiH. Sastanku su prisustvovali i direktori i predstavnici Cesta Federacije BiH, Kantonalne privredne komore TK i udruženja poslodavaca gradova Gradačca i Srebrenika.

Sastanak je realiziran pod radnim nazivom "Deblokada". Time su poslodavci iz ovih općina i regije htjeli još jednom skrenuti pažnju na probleme blokada uzrokovanih nezadovoljavajućom saobraćajnom infrastrukturom na ovom prostoru BiH.


Poslodavci su iskoristili priliku i zahvalili se premijeru i ministrima na održanom sastanku i podsjetili na probleme te predstavili najvažnije saobraćajna pravce koje bi trebalo u narednom periodu pokrenuti i razvijati s ciljem unapređenja poslovanja privrednika iz ovih krajeva ali i poboljšanja standarda života građana TK.

Tokom sastanka, u veoma profesionalnoj atmosferi, premijer, ministri i predstavnici javnih preduzeća predstavili su pokrenute i tekuće aktivnosti vezano za poboljšanje saobraćaja na ovim prostorima i pozvali načelnike Gradačca i Srebrenika da zajedničkom inicijativom i usaglašenim prijedlozima konkretizuju putanju, odnosno mrežu buduće brze ceste što će Vlada nakon detaljnih stručnih razmatranja uvrstiti kao četvrtu dionicu brzih cesta u FBiH za realizaciju u narednom periodu.

Poslodavci su zahvalni članovima Vlade na prisustvu sastanku i iskazanom razumijevanju i volji za što skorije rješavanje ovog pitanja koje danas predstavlja jedno od najvažnijih pitanja privrednog poslovanja na području TK i otvaranju ovog prostora prema drugim dijelovima BiH i susjednih zemalja.

## **Direktorica FUZIP-a na sastanku s predstavnicima poslovne zajednice u FBiH najavila donošenje posebnog programa preventivnog inspekcijskog nadzora**

### **Povod sastanka bio je unapređenje saradnje između FUZIP i udruženja koja predstavljaju poslodavce i poslovnu zajednicu u FBiH**



Na inicijativu Federalne uprave za inspekcijske poslove, direktorica Ivana Prvulović razgovarala je u prostorijama Uprave u Sarajevu s direktorom Udruženja poslodavaca FBiH Mariom Nenadićem, članom Upravnog odbora Udruženja poslodavaca FBiH Nijazom Skenderagićem i predsjednikom Privredne komore FBiH Mirsadom Jašarspahićem.

Povod sastanka bio je unapređenje saradnje između FUZIP i udruženja koja predstavljaju poslodavce i poslovnu zajednicu u FBiH, a direktorica Prvulović je istakla opredjeljenje da se u funkciji osiguranja poštivanja propisa iscrpe aspekti i mogućnosti preventivne uloge koja je Federalnoj upravi za inspekcijske poslove kao inspekcijskom organu dodijeljena Zakonom o inspekcijama FBiH. Iskazala je nadu da inspekcijski organi i poslovna zajednica mogu pronaći prostor za zajednički angažman na polju promocije zakonitog poslovanja i antikoruptivnog djelovanja te istakla da je za efikasno osiguranje poštivanja propisa potreban sinergijski pristup, a da zajednički ciljevi poslovne zajednice i Federalne inspekcije mogu biti dobar poslovni ambijent i vladavina prava.

Predstavnici poslovne zajednice su pozdravili opredjeljenje direktorice Prvulović za unapređenje saradnje između poslodavaca iz realnog sektora i inspekcijskih organa, s fokusom na edukaciju, dobru informiranost i primjenu prvenstveno preventivnih mjera i radnji usmjerenih na sprečavanje povrede propisa, a sve u cilju zaštite javnog i privatnog interesa svih učesnika u procesu. Ovakav pristup jača povjerenje u sistem i utiče na dobrovoljnu primjenu propisa od strane subjekata nadzora. Poslodavci su naglasili važnost transparentnog rada inspekcija i predložili zajednički nastup u borbi za poboljšanje sistema, unapređenje efikasnosti pravosuđa u ovom segmentu i suzbijanje sive ekonomije koja je nažalost veoma rasprostranjenja u BiH.

Direktor Nenadić je istakao da je Udruženje poslodavaca u FBiH reprezentativno udruženje sa

oko 23.000 članica, čiji je osnovni cilj unapređenje poslovnog ambijenta i stvaranje povoljnih uslova poslovanja privrednih subjekata i obrtnika, te da se saradnjom s inspekcijama mogu otkloniti mnogi problemi koji bespotrebno opterećuju realni sektor i ometaju kvalitetnu primjenu propisa. Također je predstavio probleme i poteškoće u poslovanju, potrebu bolje koordinacije i rješavanja određenih sukoba nadležnosti između inspeksijskih organa na različitim nivoima vlasti, što stvara teškoće u inspeksijskom nadzoru na terenu, pozvao na zajednički rad i saradnju predstavnika inspekcija i subjekata nadzora, s ciljem poboljšanja poslovnog ambijenta u FBiH. U tom kontekstu direktor Nenadić je pozdravio već poduzete i najavljene korake direktorice Prvulović.



Član Upravnog odbora UPFBiH Nijaz Skenderagić pohvalio je očiglednu namjeru direktorice Prvulović ka nužnom unapređenju koordinacije između inspekcija u FBiH s ciljem smanjenja troškova i jačanja saradnje u oblasti borbe protiv sive ekonomije i rada na crno koji pričinjavaju nesagledivu štetu realnom sektoru, poslovanju, ali i čitavom društvu.

Predsjednik Jašarspahić je je pojasnio da Privredna komora ima blisku saradnju s Udruženjem poslodavaca FBiH s kojim zajednički rade na unapređenju poslovnog ambijenta. Istakao je da je kroz saradnju s inspeksijskim organima moguće inicirati izmjene zakonodavnog okvira, a direktorica Prvulović je ukazala da takva obaveza proizilazi i iz Zakona o inspekcijama FBiH, kako bi se otklonile teškoće u primjeni zakona i drugih propisa u postupku ostvarivanja prava i obaveza subjekata nadzora s ciljem olakšavanja i pojednostavljivanja postupka za subjekta nadzora.

Prisutni su se složili da je saradnja u cilju podrške izgradnji pravne države, zakonitosti poslovanja, jednakosti pred zakonom, unapređenja poslovnog ambijenta i konkurentnosti, te suzbijanja sive ekonomije imperativ budućeg djelovanja.

## Rukovodstvo UPFBiH na sastanku sa ministrom Delićem



Rukovodstvo Udruženja poslodavaca u Federaciji Bosne i Hercegovine, predsjednik Adnan Smailbegović i direktor Mario Nenadić, održali su 27. augusta 2024. godine sastanak sa resornim ministrom rada i socijalne politike FBiH Adnanom Delićem. Sastanka je organizovan u sklopu redovnih aktivnosti i postavljenom praksom periodičnog pregleda aktivnosti UPFBiH i Ministarstva, a vezano za brojna pitanja od zajedničkog interesa.

Ministar Delić upoznao je predstavnika Udruženja poslodavaca u FBiH o aktivnostima na donošenju određenih zakona na kojima i Udruženje insistira. Obavijestio je predstavnike UPFBiH da početkom idućeg mjeseca počinje sa radom grupa koju je oformilo ovo ministarstvo i čiji je zadatak da detaljno pregleda i analizira Zakon o radu te da da prijedlog novog zakona odnosno izmjena i dopuna postojećeg, u zavisnosti od broja predloženih izmjena. U okviru pripreme novog Zakona o radu analizirat će se također i određena rješenja vezano za ustupanje radnika, ugovori o radu, vijeća uposlenika, ali i pitanje uređenja oblasti freelancera, tj. slobodnih profesija koje su sada nevidljive za sistem, odnosno samo se dijelom uređene važećim propisima, ali i neka druga otvorena pitanja.

Ministarstvo će nastaviti aktivnosti vezano za Zakon o posredovanju u zapošljavanju za koje je i ministar i predstavnici UPFBiH naglasili da je jedan od najvažnijih propisa za uređenje pitanja zapošljavanja, smanjenja broja nezaposlenih na evidencijama nezaposlenih osoba, uređenja pitanja zdravstvene zaštite, lakšeg pronalaska i funkcionalnije veze aktivnih tražioca posla sa poslodavcima.

Ministar je obavijestio poslodavce da je i Zakon o zapošljavanju stranca FBiH usvojen u nacrtu od strane Vlade FBiH i prosljeđen u dalju proceduru prema Zastupničkom domu PFBiH te se očekuje skoro razmatranje na ovom domu.



Poslodavci su informisali ministra i o potrebi izmjena i dopuna Zakona o zaštiti na radu kako bi se isti učinio funkcionalniji i efikasniji te kako bi se unaprijedila pitanja zaštite na radu pojednostavljenjem važećih zakonskih rješenja te je zatraženo da se prijedlozi tih

izmjena dostave resornom ministarstvu.

Tokom sastanka poslodavci su ukazali i na važnost uspostave i početak rada Ekonomsko-socijalnog vijeća FBiH, pored ostalog i zbog važnosti zakonske uloge tog tijela u proširenju potpisanih kolektivnih ugovora na sve kompanije i radnike iz oblasti koju takav kolektivni ugovor pokriva. Dvije takve odluke trenutno se očekuju ali zbog neuspostavljanja ESV-a iste nisu donesene od strane resornog ministarstva. Zamoljen je ministar Delić da ukaže članovima Vlade na važnost ovog pitanja.

Bilo je govora i o pojedinim aspektima socijalne zaštite a koji se odnose na rad poslodavaca iz realnog sektora. Predstavnici UPFBiH ukazali su na važnost uspostavljanja balansa između potreba radnika i građana FBiH i mogućnosti i opterećenja privrednika kao međusobno vrlo vezanih pitanja. Ministar je obavijestio poslodavce da je socijalna politika prilično uravnotežena sa mogućnostima i sa te strane Ministarstvo će voditi računa o opterećenju realnog sektora kada je o ovim pitanjima riječ.

Predstavnici UPFBiH zahvalili su ministru Deliću na uspostavljenoj saradnji i komunikaciji Ministarstva i UPFBiH te najavili nove inicijative vezano za rad i zapošljavanje, zajedničke projekte i drugo prema Ministarstvu s ciljem poboljšanja položaja poslodavaca iz realnog sektora sa jedne strane ali i radnika i građana s druge.

## Informacija o zloupotrebama izdatih radnih dozvola i viza tipa D



Udruženju poslodavaca u Federaciji Bosne i Hercegovine obratila se Služba za poslove sa stranicama pri Ministarstvu sigurnosti BiH sa informacijom o zloupotrebama izdatih radnih dozvola i viza tipa D.

Kako se navodi u dopisu, u nedostatku domaće radne snage, evidentne su sve veće potrebe poslovnih subjekata iz Bosne i Hercegovine za radnom snagom, najčešće iz Bangladeša, Nepala, Pakistana, Indije, Šri Lakne i drugo, uslijed čega se poslodavci obraćaju teritorijalno nadležnim terenskim centrima Službe za poslove sa strancima za ovjeru pozivnih pisama za izdavanje viza tipa D po osnovu prethodne izdate radne dozove od strane nadležnih zavoda za zapošljavanje.

Prema saznanjima Službe, radnu snagu iz ovih država u manjem broju slučajeva poslodavci osiguravaju direktnim putem i to odlaskom u zemlje porijekla, uspostavljajući kontakt prethodno sa našim ambasadama i kredibilnim kompanijama u tim zemljama, vršeći neposredan odabir tačno profilisane radne snage. Ovo se pokazalo kao sigurniji put da će poslodavci osigurati potrebnu radnu snagu i u daljim procedurama kod nadležnih organa i to zavoda za zapošljavanje, Službe za poslove sa strancima, Ministarstva valjskih poslova pribaviti za njih radne dozvole na osnovu koji se ovjeravaju pozivna pisma i potom pribave vize tipa D i nakon dolaska u BiH, ta kategorija stranih državljana ulazi u proceduru odobravanja privremenog boravka po osnovu izdate radne dozvole. U ovakvim i sličnim situacijama, Služba će ukoliko su ispunjeni svi zakonski uslovi, prioritetno rješavati zahtjeve poslodavaca.

Ono što zabrinjava u velikom broju slučajeva, poslodavci osiguravaju neprovjerenu radnu snagu posredstvom nepouzdatih posrednika u BiH ili iz zemalja porijekla koji isključivo sagledavaju svoj interes i nerijetko osiguravaju poslodavcima migrante iz visoko rizičnih zemalja (Pakistan, Nepal, Bangladeš i dr.) a ne potrebnu radnu snagu, navodi se u dopisu. Za ove aktivnosti ova lica plaćaju velike novčane iznose posrednicima ili samim poslodavcima kako bi im omogućili da im prethodno pribave radne dozvole i potrebne vize za zakonit ulazak u BiH. U prethodnom periodu, od strane pojedinih terenskih centara Službe, policijskih i drugih organa, uočene su



sve veće zloupotrebe gdje strani državljani, u najvećem broju iz Pakistana, Bangladeša i drugom nakon što dobiju vizu tipa D i dođu u BiH te ostvare pravo ili ne ostvare dugoročan boravak, vrlo brzo

napuste poslodavca i potom se udalje u nepoznatom pravcu. Iz tog razloga nastalih zloupotreba na osnovu prethodno izdatih radnih dozvola i izdatih viza tipa D, Služba je donijela rješenja i ukinula vize tipa D za 39 državljana Pakistana, dok je u proceduri ukidanje viza tipa D za 14 državljana Bangladeša i o sve tome obavijestila MIP i druge nadležne organe.

Iz Službe napominju da za razliku od posrednika, poslodavci u skladu sa Zakonom o strancima imaju zakonsku obavezu snošenja svih troškova koji mogu nastati u BiH za pozivano lice tokom njegovog boravka, uključujući i troškove smještaja pod nadzorom u IC te troškove udaljenja iz BiH, koji sagledavajući sve činjenice, su izuzetno visoki.

Iz Službe mole Udruženje poslodavaca u Federaciji Bosne i Hercegovine da pravovremeno obavijeste i upoznaju članove kako bi u narednom periodu koristili dobra iskustva određenih kompanija i na sigurniji način pristupili osiguranju radne snage i za takvu pribavili radne dozvole i ulazili u dalje procedure.

Kompletan dopis možete pročitati [OVDJE](#).



## Primjena Uredbe o isplati pomoći od strane poslodavaca



Porezna uprava Federacije Bosne i Hercegovine na svojoj web stranici objavila je uputu za primjenu Uredbe o isplati pomoći od strane poslodavaca.

Uredbom o isplati pomoći od strane poslodavaca, koja je objavljena u Službenim novinama Federacije Bosne i Hercegovine broj: 56/24 od 19.07.2024. godine, a stupila na snagu 27.07.2024. godine, uređuje se pravo na isplatu pomoći od strane poslodavca, dinamika i način realizacije isplate.

Članom 3. Uredbe propisano je da poslodavac može izvršiti isplatu pomoći, što znači da je data mogućnost, a ne obaveza poslodavcima za isplatu.

Shodno Uredbi, pravo na pomoć, usljed inflatornog rasta cijena, ima lice koje ima zasnovan radni odnos sa poslodavcem odnosno lica zatečena u radnom odnosu na dan isplate novčanog iznosa.

Poslodavac može, na osnovu Uredbe, izvršiti isplatu pomoći u maksimalnom iznosu do 2.768,00 KM (dvije hiljade sedamsto šezdeset osam konvertibilnih maraka).

Ograničen je maksimalan iznos koji se po ovom osnovu može isplatiti, ali poslodavac može

isplatiti i manji iznos.

Pomoć se može isplatiti u periodu od dana stupanja na snagu ove Uredbe odnosno od 27.07.2024. godine - 31.12.2024. godine, tj. najkasnije do dana prestanka važenja ove uredbe.

Isplata pomoći se vrši isključivo na transakcijske račune radnika.



Ova vrsta pomoći ne smatra se plaćom ili naknadom plaće prema odredbama Zakona o radu i pomoć u smislu ove Uredbe ne podliježe oporezivanju porezom na dohodak shodno izmjenama Pravilnika o primjeni Zakona o porezu na dohodak, objavljenih u Službenim novinama Federacije BiH broj: 56/24.

Isplata pomoći može se izvršiti do šest tranši (dijelova), s tim da ukupan iznos ne može preći iznos od 2.768,00 KM.

Pomoć se može isplatiti i jednokratnom tranšom.

Poslodavac je dužan donijeti interni akt (npr. odluku, pravilnik) kojim će se, između ostalog, urediti iznos pomoći, datum isplate, broj tranši i uslovi isplate.

Pojedinačni akti, koje donosi poslodavac za ostvarivanje prava iz člana 2. Uredbe, obavezno se donose u pisanom obliku.

U skladu sa Uredbom poslodavac je dužan do 15. u mjesecu za protekli mjesec u kojem je izvršena isplata pomoći ili dijela pomoći, dostaviti nadležnoj Poreznoj ispostavi Izvještaj o isplati pomoći (npr. za mjesec juli do 15. augusta, za august do 15. septembra, za decembar do 15. januara 2025. godine).

Izvještaj o isplati pomoći se podnosi na propisanom obrascu koji je sastavni dio Uredbe. Propisani obrazac je dostupan na web-stranici Porezne uprave Federacije BiH na lokaciji <https://www.pufbih.ba/v1/novosti/obavjestenja> [BS](#), [HR](#), [SR](#)

Navedeni obrazac Izvještaja porezni obveznik dužan je dostaviti:

- putem elektronske pošte na adresu [uredba@fpu.gov.ba](mailto:uredba@fpu.gov.ba) ili
- lično ili putem pošte kao preporučenu pošiljku nadležnoj poreznoj ispostavi prema sjedištu.

Ukoliko je Izvještaj dostavljen putem elektronske pošte, isti nije potrebno dostavljati u nadležnu poreznu ispostavu.

Porezna uprava će na osnovu dostavljenih izvještaja poreznih obaveznika sačiniti izvještaj prema Federalnom ministarstvu finansija.

Cilj donošenja Uredbe je vid dodatne podrške dohotku radnika usljed rasta indeksa cijena. Izdvajanje određenih kategorija radnika kojima će se isplatiti pomoć ili različiti iznosi nije u skladu sa uslovima iz Uredbe.

Prema tome, ako je poslodavac donio Odluku o isplati pomoći, isplata pomoći vrši se svim zaposlenicima koji su zatečeni u radnom odnosu na dan isplate pomoći, bez diskriminacije na bilo koji način.

## Direktor UPFBiH prisustvovao otvorenju 51. Sajma šljive u Gradačcu

Direktor Udruženja poslodavaca u FBiH Mario Nenadić prisustvovao je otvorenju 51. Sajma šljive u Gradačcu koji je otvorio premijer Vlade FBiH Nermin Nikšić. Na oko 5000 metara kvadratnih predstavilo se više od 300



izlagača iz Bosne i Hercegovine, zemalja regiona, Njemačke i Turske. Organizator ovogodišnje sajamske manifestacije je Turistička zajednica grada Gradačca, a partner Grad Gradačac.

Cilj najstarije specijalizirane sajamske manifestacije je, pored predstavljanja poljoprivrednih i prehrambenih artikala, promocija i bolje povezivanje poduzetništva Tuzlanskog kanona i BiH, privrednih subjekata u regionu, te jačanje turizma i turističke ponude.

– Siguran sam da će Sajam i sajamske noći opravdati očekivanja. Doživjeti šest decenija organizovanja jednog ovakvog događaja i uz to napraviti brend poput Sajma šljive nije lako. Gradačac to radi veoma uspješno. Oko 300 izlagača je prepoznalo interes za dolazak na sajam u Gradačcu kako bi stvarali partnerstva i širili biznis. Vlada Federacije BiH, u želji da ravnomjerno razvija sve sredine, će u ovoj godini pomoći razvoj Gradačca sa peko pet miliona maraka, rekao je premijer Vlade FBiH Nermin Nikšić.

Sajam šljive u Gradačcu je manifestacija koja je pokrenuta još 1969. godine i najstarija je specijalizovana sajamska manifestacija u Bosni i Hercegovini. Osim izložbenog segmenta, na Sajmu će, u saradnji sa USAID-om u četvrtak biti održane dvije panel diskusije. Prva je o ekonomskom razvoju na temu „Kako odgovoriti na izazove klimatskih promjena“ a druga će biti „Turizam i ruralni razvoj – potencijali razvoja Gradačca“. Također, u petak će biti održana naučno-stručna predavanja za poljoprivrednike, izlagače i posjetioce Sajma šljive. Govorit će se o značaju kupovine domaćih proizvoda i naporima da se promovira domaća proizvodnja, o proizvodnji povrća u zaštićenom prostoru, a posebna pažnja bit će posvećena i osiguranju usjeva i plodova od rizika gubitka prihoda. Također bit će govora i o razvoju turističke infrastrukture kao temelja održivog turizma u Tuzlanskom kantonu.

## Ministar finansija informirao Vladu o statusu pripreme seta fiskalnih zakona

Zamjenik premijera FBiH i federalni ministar finansija Toni Kraljević na sjednici Vlade FBiH održanoj 01. augusta 2024. godine, informirao je Vladu Federacije BiH sa procesom izrade seta fiskalnih zakona i njihovom upućivanju u Parlament Federacije BiH.

Istaknuto je da su do sada poduzete ključne aktivnosti na izradi sveobuhvatne fiskalne reforme u Federaciji BiH. Opredjeljenje Vlade Federacije BiH je upućivanje ovih zakonskih rješenja u redovnu parlamentarnu proceduru u toku ovog kalendarskog ljeta.

Premijer Federacije BiH Nermin Nikšić i ministar Kraljević informirali su Vladu da set fiskalnih zakona uključuje najoptimalnija rješenja ka postizanju tri cilja, a koji podrazumijevaju poboljšanje standarda radnika, rasterećenje privrednika, te zadržavanje fiskalne stabilnosti.

Mjere fiskalne politike Vlade Federacije zasnovane su na nastavku reformskih aktivnosti u pet najznačajnijih segmenta. To su smanjenje opterećenja rada, kao i restrukturiranje poreznog opterećenja, zatim unapređenje pružanja javnih usluga, te suzbijanje neformalne ekonomije i kontinuirano unapređenje koordinacije i fiskalne odgovornosti između svih nivoa vlasti u FBiH.

Također, bitnim je navedeno očuvanje finansijske stabilnosti, te jačanje održivog, učinkovitog i stabilnog ekonomskog rasta, kao i povećanje konkurentnosti privrede.

Federalno ministarstvo finansija intenzivno radi na setu zakonskih rješenja koja će pomiriti obje strane, i poslodavce i radnike, a istovremeno će osigurati neometanu isplatu zagarantiranih prava penzionera i socijalnih kategorija. S obzirom da je riječ o sistemskim zakonima, naglašeno je potrebnim otvoriti širu javnu raspravu kako bi svi imali priliku uložiti amandmane i iznijeti svoje prijedloge. Set ovih zakona bi trebao stvoriti preduslove za novi ekonomski i investicijski ciklus koji je potreban svim građanima.

Nakon što prednacrti ovih reformskih zakona budu upućeni u parlamentarnu proceduru, svi zainteresirani moći će se uključiti u javnu raspravu, a sve kako bi se došlo do najboljih rješenja.



# UDRUŽENJE POSLODAVACA

---

**UDRUŽENJE POSLODAVACA FBiH**  
**MARŠALA TITA 6, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**